

2. naćisk, 2.5.2024



## Program DOMOWINY

zamołwitosć – wotewrjenosć – zwjazanosć





## Preambla

W lěće 1912 založi so Domowiny jako třěšny zwjazk serbskich towarstwow. To bě wusahowacy podawk w serbskich stawiznach. Přez to so wola k zjednoćenju mocow w serbskim narodnym hibanju jasnje zwurazni a přeni raz zeskutkowni. Po měrliwej rewoluciji 1989/90 je so Domowina k politisce njewotwisnemu a nadstronskemu třěšnemu zwjazkej Serbow a serbskich towarstwow přetworila. Džensa je Domowina zakonsce připóznata zastupjerka zajimow serbskeho luda. Služimy swojemu člonstwu kaž tež cyłemu serbskemu ludej.

Domowina so k Zakładnemu zakonjej wuznawa. W zhromadnosći europskich narodow smy runohódni a zasadźujemy so za swobodu a měr. Wotpokazamy kóždužkuli formu ekstremizma.

Program Domowiny je zakład skutkowanja třěšneho zwjazka. Džělowe směrnicy Domowiny konkretizuja powšitkowne zaměry programa. Kóždy, kotremuž na Serbstwje a předewšěm na našej rěči zaleži, njech so w třěšnym zwjazku angažuje.

Zamołwitosć Domowiny za serbski lud skutkować wuchadža ze stawiznow. Wotewrjenosć woznamjenja, zo smě so kóždy z nami za serbski lud zasadźować. Zwjazanosć zwuraznja so w zhromadnym prócowanju wo wobstaće našeho ludu.

Zamołwitosć – wotewrjenosć – zwjazanosć su zakładne hesła jednanja Domowiny.



## Zakładne hesła jednanja Domowiny

### Zamołwitosć

Škit, spěchowanje a wuwijanje rěče, žiwjenskeho ruma, kultury a identity Serbow kaž tež prócowanja wo rozšěrjenje prawa samopostajenja w serbskich naležnosćach su hłowne zaměry našeho zhromadneho skutkowanja.

Jako zakonsce připóznate zastupnistwo zajimow Serbow jednamy zamołwiće a za wšitkich Serbow. Chcemy-li serbstwu přichod dać, ma so kóždy jednotliwec po svojich móžnosćach za to zasadžować.

### Wotewrjenosć

Domowina je wšitkim Serbam a přećelam Serbow wotewrjena – hač bydla we Łužicy abo zwonka njeje, hač jednotliwec abo towarstwo. Podpěramy najwšelakoriše móžnosće za wobdźělenje na serbskim towaršnostnym a kulturnym žiwjenju. Smy demokratisce organizowane zastupnistwo serbskich zajimow a jednamy transparentnje. Naši čłonojo su zakład skutkowneje syće serbskeje ciwilneje towaršnosće. Kóždy je přeprošeny sobu skutkować.

### Zwjazanosć

Serbske stawizny, kultura, rěč a z toho wuchadźaca narodna identita, kaž tež zhromadne narodne prócowanje - wšo to nas zwjazuje. Runohódnosć delnjo- a hornjoserbsčiny jednoća naš lud. Skutkujemy w zmysle tuteje zwjazanosće, kotraž wšitke regiony Łužicy wopřija. Zdobom zwjazuja aktiwity Domowiny najwšelakorišich partnerow we Łužicy a zwonka njeje.

Jako zastupjerka serbskich zajimow skići Domowina wšěm Serbowkam a Serbam kaž tež přećelam Serbow pomoc při narodnym dźěle.



# **Serbski lud skrućić, rěč a kulturu wobchować**

## **I. Zwjazk Łužiskich Serbow**

Čłonstwo w Domowinje je zakład demokratiskeho skutkowanja w třěšnym zwjazku. Džěło člonskich župow a towarstwow podpěrać je nam bytostny nadawk. Woni su nošerjo towaršnostneho žiwjenja w Serbach. Aktiwne sobudžěło jednotliwcow, towarstwow, župow a organow Domowiny při zwoprawdženju wobzamknjenjow hłownych zhromadźiznow Domowiny je zakład za wuspěšne skutkowanje třěšneho zwjazka.

Zhromadnje wabimy za skutkowanje w Domowinje. Kóždy, hač jednotliwc abo towarstwo, je nam jako člon třěšneho zwjazka witany. Zakład za zhromadne džěło tworja wustawki a program Domowiny.

## **II. Politiske zastupnistwo**

Domowina zastupuje zajimy serbskeho luda, štož je so tež do serbskeju zakonjow zapisalo. Wona stara so wo rozšěrjenje sobu- a samopostajowanskich prawow a winowatosćow předewšěm w serbskich politiskich, kulturnych a kubłanskich naležnosćach. Jednamy ze wšěmi demokratiskimi akterami na komunalnej, krajnej, zwjazkowej kaž tež europskej runinje. Wudžeržujemy mjezynarodne politiske styki k druhim mjeńšinam a ludam. Při tym je wažny nadawk Domowiny wědu wo Serbach we Łužicy a zwonka njeje dale šěrić.

## **III. Škit a wozrodženje serbšćiny**

Serbšćina je nam najdrohotniše džědźinstwo našich prjedownikow. Jeje pěstowanje, škit a wozrodženje je nam najwažniši nadawk. Pozbudžujemy swójby k pěstowanju serbšćiny. Zasadźujemy so za zwoprawdženje efektiwnych, rěč spěchowacych napravow, wosebje w pěstowarnjach a šulach. Přewjedžemy a podpěramy naprawy k wožiwjenju serbšćiny wšudže tam, hdžež wona tuchwilu kruty wobstatk zjawneho žiwjenja njeje.

## **IV. Kultura a sport, wuměłstwo a wědomosć**

Kulturne džěło, sportowe hibanje, wuměłstwo a wědomosć su wažne stołpy serbskeho žiwjenja a džěławosće třěšneho zwjazka. Zdobom su akterjo na tutech polach pósłancy našeho luda we Łužicy a zwonka njeje. Podpěramy wuměnu wosebje ze słowjanskim wukrajom a druhimi narodnymi mjeńšinami. Spěchujemy zhromadne džěło serbskich institucijow z lajskimi ćělesami. Zhromadne projekty institucijow wobohaćeja kulturne žiwjenje w Serbach.



## **V. Nabožno-narodne žiwjenje**

Bohate namrěwstwo nabožno-narodnych tradicijow a nałožkow je wobstatk žiwjenja Serbow, tež za přichodne generacije. Jich aktivne pěstowanje je wažny zakład za wutworjenje a skrućenje tež narodneho wědomja. Wosady su njeparujomne serbske rěčne rupy a socialne syće.

## **VI. Łužica jako hospodarski rum**

Hospodarstwo je rjap Łužicy a wobwliwuje njeposrědnje položenje našeje domizny a serbskeho luda. Ze spěchowanjom serbskeje rěče a kultury zwyżimy atraktiwitu regiona. Wosebje dwu- a wjacerěčnosť je za lužiske předewzaća z dobytkom. Podpěramy wšitke naprawy, kotrež pohnuwaja regionalne gospodarstwo k wužiwanju serbšćiny. Zasadžamy so za kooperaciju Łužicy z nahraničnymi kónčinami Pólskeje a Čěskeje. Podpěrjeme lahodny turizm, kotryž zmóžnja hosćom serbsku kulturu we Łužicy zeznać.

## **VII. Łužica – naša domizna**

Łužica je srjedžišćo a domizna Serbow. Zasadžamy so za to, zo by so serbskosć sydlenkeho ruma wobchowala. Džiwamy na zaměrne zapřijeće serbskeje rěče a kultury do regionalneho, komunalneho a krajneho planowanja. Lětstotk trajace wudobywanje brunicy zawostaji serbskemu ludej wulke straty. Proces strukturneje změny skića nam nowe perspektiwy za wozrodženje a spěchowanje serbšćiny.

“Trać dyrbi Serbstwo, zawostać!”

Handrij Zejler

*naćisk programoweje komisije, 2.5.2024*